

Comite di Conmemoracion Pasado di Sclavitud presenta oficialmente sin representacion di Aruba

Ayer a ser presenta oficialmente e Comite di Conmemoracion Pasado di Sclavitud, cual manera minister di Cultura demisionario, Xiomara Maduro a informa anteriormente, Aruba no lo forma parti di esaki pa motibo di su disgusto pa con Hulanda tabata trata Aruba relaciona cu e tema di refinanciamiento di debe di COVID.

Segun e noticiero local, Noticia Cla, a indica e Comite a ser presenta oficialmente na prensa Hulandes ayer y Aruba a keda afo di dicho Comite den forma protesta.

Den un articulo anterior di Bon Dia Aruba, ya caba a trece dilanti cu Gobierno di Aruba a cumpli cu su menasa di boicotia e Comite di Conmemoracion di Pasado di Sclavitud. Segun un articulo di portal noticiero, Dossier Koninkrijksrelaties e motibo di e boycott ta cu Gabinete Wever-Croes II ta expresando su disgusto pa e tasa di interes cu Hulanda a impone riba e prestamo tempo di pandemia di Covid.

Manera ta conoci, Aruba ta pagando un tasa di interes mas halto cu Corsou y Sint Maarten, pasobra a nenga di introduci un Ley di Reino riba Supervision Financiero (Rijkswet). E tasa di interes ta bay baha unabes cu entrega e ley na Parlamento.

Den luna di november 2023 Minister di Finanzas y Cultura, durante un discurso na ocasion di encuentro di Genootschap Nederland Aruba riba Herdenkingsjaar Slavernijverleden dia 11 di november 2023 na Den Haag, a critica e actitud di Hulanda den e negociacion pa refinanciamiento di e prestamonan di tempo di pandemia di coronavirus.

E momento ey minister Maduro a recorda cu dia 19 di december, Hulanda a duna disculpa pa pasado di sclavitud. El a destaca e comentarionan di prome minister Evelyn Wever-Croes e tempo ey, den cual el a bisa cu disculpa bon intenciona semper ta bon bini. Pero el a bisa cu su palabranan ta insinua e necesidad di sinceridad y reconocemento den e proceso di reconciliacion.

E mandatario a expresa cu a



pesar cu di banda di Hulanda a pidi disculpa, na Aruba ta reina incertidumbre tocante e sinceridad cu cual a duna esaki. “E incertidumbre aki ta keda reforsa pa e presion politico y economico cu Hulanda ta eherce riba Aruba,” el a remarca. El a sigui bisa cu den esaki e ta referi na e manera con e paisnan den Reino – Aruba, Corsou y Sint Maarten – a ser tata durante e negociacionnan pa refinanciamiento di e debenan di Covid, indicando cu “ta necesario pa auto-reflexiona.”

E tempo aya, Maduro ta resalta cu e ta sorprendi cu Hulanda, a traves di Ministerio di Relacion Exterior a impone un interes asina halto pa Aruba y tambe cu nan ta pone presion pa un acuerdo predetermina y usa menasa como medio di presion pa firma e acuerdo di refinanciamiento.

El a subraya cu tal trato pa

un solicitud di ayudo dentro di Reino, den e aña di conmemoracion di historia di sclavitud, no merece ningun premio y no por wordo splica di un bon manera den ningun idioma.

“Hulanda no por di un banda disculpa pa e historia di sclavitud y di otro banda impone un ‘strafrente’ pa Aruba balora na mas di 300 milyon florin (150 milyon euro) cu e ta gana cu e sufrimento di e pueblo di Aruba durante e pandemia. E accion aki di Hulanda ta refleha un practica colonial, ora cu mester a saca probecho di e colonianan,” Maduro a enfatisa e tempo ey.

Maduro a critica e actitud di Hulanda. El a recorda cu a rekeri pa Aruba firma un acuerdo di refinanciamiento pa e prestamonan di Covid prome cu dia 10 di october ultimo, pa cual tabatin dos

opcion: “bay di acuerdo cu e ley di reino pa supervision financiero (RAft) door di cual nos lo ricibi un porcentahe di interes di 3,4%, of si no bay di acuerdo cu e ley di reino, un interes di 6.9%, cual en realidad ta un ganashi pa Hulanda di 3.5%.”

“Lo tabata miho si Hulanda tabatin mas comprension pa e paisnan Caribense den Reino. E negociacion y e imposicion di loke nos ta yama “tarifa di castigo” en realidad ta refleha un actitud colonial, y ta de hecho un forma nobo di sclavitud,” segun Maduro.

Sinembargo, Hulanda ya a laga bon cla kico ta su motibonan pa insisti riba un ley di Reino na lugar di un landsverordening di Aruba. Y tambe ta tene cuenta cu e situacion financiero di Aruba ya tabata precario prome cu e pandemia – un situacion laga atras pa gobiernonan anterior,

sigur, pero un situacion cu pa Hulanda ta nifica riesgo den nan propio finanzas. Considera por ehemplo cu Hulanda mester a haci amienda den su propio presupuesto e aña aki pa tene cuenta cu Aruba no lo paga e prestamo di Covid back e aña aki, y cu e placa cu a fia ta e placa di e pagado di belasting Hulan-

des. Na final di e discurso, minister Maduro a informa na esnan presente cu Ministerio di Finanzas y Cultura lo no forma parti mas di e agenda pa conmemora e abolicion di sclavitud den Reino Hulan-

des. “Ta para tur trabou ‘tot nader orde’ y e motibo principal pa esaki ta e manera di trata cu otro den e negociacionnan pa refinancia e debe di e pandemia, y e ‘strafrente’ di 300 milyon florin cu e pueblo di Aruba ta haya pa paga pa un yudansa basa riba articulo 36 di statuut.”

E representantenan di e otro islanan cu a join e Comite di Conmemoracion a keda anuncia dia 27 di januari ultimo, durante un presentacion. Tareanan di e comite ta inclui aumenta conocimiento y conscientisacion tocante e pasado di sclavitud. E miembronan prospectivo di e comite ya a participa den un siman di trabao na Corsou, sin cu tabatin un representante di Aruba. E Comite di Conmemoracion ta bay conta cu sosten di un organizacion di trabao cu oficina na tanto Hulanda Europeo como e parti Caribense di Reino.

